

# PSR – cun in copresidi e nov logo

Dà ina contribuiziun per derasar gasettas rumantschas

■ **(anr/gc) Cun Annetta Zini e Flurin Bundi ha la Pro Svizra Rumantscha (PSR) survegnì per l'emprima giada in copresidi. Tras ina contribuiziun da 6'000 francs vul la PSR finanziar abunaments da gasettas rumantschas.** A la radunanza annuala da la PSR – venderdi-saira a Cuira – è vegnì sa regurdà en gronda engraziavladad e stima da Toni Cantieni, mort dacurt. El ei stà 1992 l'iniziant, capofundatur ed emprim president da la PSR – e quai fin 2001. Questa fundaziun è stada in pass decisiv per arrivar – tenor la finamira principala da la PSR – ad ina gasetta rumantscha dal di, che la odierna interpresa Somedia ha la finala realisà 1997.

## In copresidi a la testa

Cun *Annetta Zini*, Cuira, e *Flurin Bundi*, Sagogn/Turitg, ha la PSR survegnì per l'emprima giada in copresidi. Els eran già suprastants ed èn daventads successurs da *Catarina Morscher*, Sur, che ha demissiunà suenter trais onns.

La demissiun avevan era inoltrà *David Carigiet*, Glion, e *Maurus Blumenthal*, Rothenburg. En suprastanza èn vegnids elegids da nov: *Barbla Etter*, Friburg; *Jon Bischoff*, Turitg, e *Clau Dermont*, Rueun. Ina giuvna suprastanza.

## Sustegnair la derasaziun da gasettas rumantschas

Già avant in onn è la suprastanza da la PSR vegnida incaricada da ponderar co dar sustegn finanziar a las gasettas rumantschas. La consequenza è stada ch'igl ha dà ina maisa radunda cun tuts pertutgads, insatge che vegn anc a sa cuntinuar.

Bain ord la medema ponderaziun ha era *Claudia Cadruvi* inoltrà a la PSR ina proposta. Quella duai impunder ils proxims tschintg onns sias entradas annualas per finanziar abunaments da gasettas rumantschas (La Quotidiana e la Pagina da Surmeir). Da quai duajan oravant tut famiglias giuvnas en il territori rumantsch profitar. La motivaziun è tant evidenta sco giustifitgada, siond la PSR vegnida fundada primarmain per realisar e sustegnair ina gasetta rumantscha dal di.

I dat ina lunga discussiun. Davart la necessitad dal sustegn èn ins d'ina opiniun. Concernent durada e dimensiun per quest agid datti discussiun e propostas. La finala sa decidan ins da dar in sustegn da 6'000 francs per in onn. La suprastanza duai dentant restar en contact e contrahar cun ils represchents da las gasettas rumantschas per guardar, co quai possia alur sa cuntinuar. Igl è in pitschen pass, dentant bainvegni, che va en la dretga direziun ed è era merità.

## La PSR cun bunas finanzas

Il quint da la PSR da 2015 serra tar entradas ed expensas da sur 7'000 francs cun in gudogn da prest 600 francs. Quest augmenta la facultad sin 53'700 francs. Dapreschent ha la PSR 270 commember.

## In nov logos.

La suprastanza ha laschè far la graficra *Anmatina Nay* in nov logo per la PSR. Ella ha preschentà duas propostas. Il logo cumpact (cotschen) chatta dapli accoglientescha che quel be en scrit.



La nova suprastanza da la PSR: (da san.) Martin Cantieni, Clau Dermont; Flurin Bundi (copresident); Annetta Zini (copresidenta), Jon Bischoff e Barbla Etter